



**ENTI RREGULLATOR I ENERGJISË
BORDI
VENDIM**

Nr.120, Datë 27.07.2017

MBI

**PËRCAKTIMIN E ÇMIMEVE TË BLERJES SË ENERGJISË ELEKTRIKE TË
PRODHUAR NGA BURIMET E VOGLA GJENERUESE FOTOVOLTAIKE ME
KAPACITET TË INSTALUAR DERI NË 2 MW DHE EOLIKE ME KAPACITET TË
INSTALUAR DERI NË 3 MW.**

Në mbështetje të nenit 10 pika 2 dhe 16 të Ligjit nr. 43/2015, “Për Sektorin e Energjisë Elektrike”, nenit 10, pika 3 të Ligjit nr. 7/2017 “Për nxitjen e përdorimit të energjisë nga burimet e rinovueshme”; dhe Vendimit të Këshillit të Ministrave nr. 369, datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”, nenit 22 të “Rregullave të Organizimit, Funkcionimit dhe Procedurave të ERE”, miratuar me Vendimin e Bordit të ERE nr.96, datë 17.06.2016, Bordi i Entit Rregullator të Energjisë (E.R.E), në mbledhjen e tij të datës 27.07.2017, mbasi shqyrtoi relacionin e Drejtorive Teknike, në lidhje me “Përcaktimin e çmimeve të blerjes së energjisë elektrike të prodhuar nga burimet e vogla gjeneruese fotovoltaike me kapacitet të instaluar deri në 2 MW dhe eolike me kapacitet të instaluar deri në 3 MW”.

Konstatohet se:

- ERE ka detyrimin e përcaktimit të çmimit të blerjes së energjisë elektrike të prodhuar nga burimet e vogla të rinovueshme nga dielli dhe era, në bazë të nenit 10, pika 3 të Ligjit nr. 7/2017 “Për nxitjen e përdorimit të energjisë nga burimet e rinovueshme”.
- VKM nr.369, datë 26.04.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”, në pikën 2 të tij, ngarkon ERE-n me miratimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era, në përputhje me çmimin e mesatarizuar për vitin 2017, sipas parashikimeve të kësaj metodologjie.
- Me vendimin nr. 89 datë 07.06.2017, Bordi i ERE ka vendosur për fillimin e procedurës “Për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”
- Në vijim ERE, mbasi shqyrtoi VKM nr. 369, datë 26.04.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era, formuloi një sërë pyetjesh për

sqarimin e kësaj metodologjie të cilat i'a adresoi Ministrisë së Energjisë dhe Industrisë për sqarim.

- Ministria e Energjisë dhe Industrisë me shkresën e saj nr. 4445/1 prot. dt.04.07.2017, dërgoi në ERE-s sqarimet si më poshtë:
 - *Gjykojmë se LCOE ka të njëjtën formulë për të gjitha teknologjitë gjeneruese, si nga burime të rinovueshme, ashtu edhe ato fosile. Po kështu LCOE llogaritet me të njëjtat variabla dhe me të njëjtat praktika ndërkombëtare të se njëjtës fushë: gjenerimin e energjisë në impiantin gjenerues i cili merr në konsideratë kostot e kapitalit, kohën e vetëshlyerjes, shpenzimet e operimit dhe mirëmbajtjes, si edhe kostot e lëndës djegëse. Në këtë kuptim, VKM referon këtë formulë e cila është universale për LCOE-në dhe këto janë bazat e metodologjisë:*
 - *praktikat me të mira të përcaktimit të LCOE dhe*
 - *propozimin e formulës llogaritëse ose algoritmit bazuar mbi këto praktika*
 - *Metodologjia e propozuar përmban elementet bazë të saj: (i) sistemin e rregullave dhe parimeve; (ii) metodën e llogaritjes dhe (iii) objekti konkret që ka të bëjë me impiantet PV dhe Eolike, përkatësisht 2MW dhe 3MW dhe është sipas të gjitha praktikave Metodologji për përcaktimin e çmimit të blerjes së energjisë elektrike nga impiante të vogla gjeneruese me burime të rinovueshme.*
 - *Metodologjia e propozuar është për objektin konkret: Impiante fotovoltaike deri në 2MW dhe impiante eolike deri në 3 MW, duke ju përmbajtur nën 10 pika 3.*
 - *Aktualisht në Shqipëri nuk ka investime të kësaj natyre të impianteve me diell (PV) apo me erë (Eolik), dhe për këtë arsye **ka një mungesë të theksuar të të dhënave lidhur me planet e biznesit dhe kostot shoqërore, me qëllim kryerjen e një analize të saktë të kostove në kushtet e vendit tonë. Informacioni që disponojmë nga propozime të pa kërkuara është se ka një shumëllojshmëri analizash dhe kostosh të cilat asnjëherë nuk kanë proceduar në investim konkret. Në këto kushte, referencat janë të bazuara në studimet që disponohen, dhe mbi bazën e këtyre studimeve, rezultojnë se orët e punës së impianteve me diell, ndryshojnë nga ato me erë dhe ky faktor, përbën edhe ndryshimin në llogaritjen e çmimit për të dy impiantet, megjithëse WACC rezultojnë i njëjtë.***
- Në vijim të praktikës, ERE organizoi një Seancë teknike dëgjimore më datë 10.07.2017 me përfaqësues të Ministrisë së Energjisë dhe Industrisë në lidhje me zbatimin e VKM 369 datë 26.4.2017, “Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”.
- Në përfundim të seancës dëgjimore, nga përfaqësuesit e Ministrisë së Energjisë dhe Industrisë u bë me dije :
 - *Objekti i Metodologjisë është përcaktimi i çmimit të blerjes së energjisë elektrike nga impiante të vogla gjeneruese me burime të rinovueshme deri në 2MW me fotovoltaiket dhe deri në 3MW instalime me impiante eolike. Kjo Metodologji reflekton politikën energjetike të Këshillit Ministrave, në përputhje me parashikimet e vendosura nga legjislacioni përkatës.*

- *Duke qënë se nuk ka eksperiencë të tjera apo të dhëna mbi kostot reale të projekteve, çmimi i referuar si i mesatarizuar në metodologji, duhet t'i shërbejë ERE gjatë vendimmarrjes për vitin 2017.*
- *Nëse ERE gjatë zbatimit të ketyre çmimeve përgjate vitit 2017, vëren luhatje, mospërputhje dhe paqartësira, ajo mund të beje propozime konkrete për përmirësimin dhe rishikimin e metodologjise per periudhen ne vazhdim.*
- Në bazë të propozimit të metodologjisë së miratuar nga KM, duke marrë parasysh mungesat e të dhënave lidhur me kostot e investimit dhe operimit të teknologjive fotovoltaike dhe eolike në vend, mungesa e eksperiencave të mëparshme për incentivimin dhe mbështetjen e investimeve në këtë fushë si dhe duke bërë një krahasim me çmimet e rajonit për këto burime, për të mundësuar nxitjen e investimeve në këto teknologji, ERE mbasi shqyrtoi VKM nr. 369 datë 26.4.2017, *“Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”* dhe relacionin argumentues të metodologjisë merr ne konsideratë:
 - riskun e vendit
 - riskun e politikave energjetike për nxitjen e burimeve të rinovueshme
 - gjetjet e studimit të IRENA-s për llogaritjen e LCOE-së për Shqipërinë të marrë në konsideratë nga VKM nr. 369 datë 26.4.2017, *“Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”*, për një afat 15 vjeçar që parashikohet t’u jepet burimeve të energjive të rinovueshme në Shqipëri sipas ligjit 7/2017 *“Për nxitjen e përdorimit të energjisë nga burimet e rinovueshme”*.
- Në vijim përgjatë kësaj periudhe me shkresën nr. 255/1 datë 19.07.2017 Autoriteti i Konkurrencës, në përgjigje të shkresës së ERE-s nr. 453 prot, datë 13.06.2017 me të cilën është dërguar vendimi i ERE-s nr.89 datë 07.06.2017 për opinion, shprehet se Autoriteti i Konkurrencës pasi shqyrtoi vendimin e ERE, konkludoi se :
 - do të shprehet pasi të marrë informacionin e plotë , të saktë dhe të qartë, sipas kërkesës së pikës 2 të vendimit.
 - përgjatë këtij procesi duhet të merret në konsideratë vendimi i Autoritetit të Konkurrencës nr.408 datë 21.03.201 *“Per disa rekomandime për Entin rregullator të Energjisë mbi draft metodologjinë e tarifës fikse të energjisë elektrike të prodhuar nga burimet e rinovueshme”*
- Nga ana jonë u vijua komunikimi me shkresën nr.453/2 datë 25.07.2017 ku i’u dërguan kërkesat tona drejtuar MEI-it si dhe shkresa e MEI-it nr 4445/1 datë 04.07.2017.
- Në përfundim të këtij komunikimi Autoriteti i Konkurrencës me shkresën Nr.453/3 Datë 27.07.2017, përcolli në ERE qëndrimin e tij, duke u shprehur se : I konsideron të përshtatshme parashikimet e VKM nr. 369 datë 26.4.2017, *“Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”*.

- Me qëllim mbledhjen e të dhënave sa më plotësuese ERE ngriti një grup pune I cili kreu një monitorim në impjantin PV në UKKO për marrjen e informacioneve në lidhje me kostot e investimit, O&M, shpenzime pune, si dhe kostot financiare e orët e punës me kapacitet të plotë.

Për gjithë sa më sipër, Bordi i ERE-s,

Vendosi:

1. Për vitin 2017 çmimi për të gjithë kontraktuesit e ndërtimit të impjanteve të jete:
 - a) për burimet e energjisë PV(Fotovoltaikët) në vlerën 100 Euro/MWh
 - b) për burimet e energjisë nga era (Eolike) 76 Euro/MWh
2. Duke filluar nga viti 2018, për investimet në vijim, ERE, në bazë të grumbullimit të të dhënave, përsa i përket kostove reale të investimit, nëse rezultojnë të ndryshme nga parashikimet e VKM nr. 369 datë 26.4.2017, *“Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era”*, t’i propozojë MEI-t për përmirësimin dhe rishikimin e VKM.
3. Drejtoria Juridike dhe e Mbrojtjes së Konsumatorit të njoftojë palët e interesuara për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

KRYETARI
Petrit AHMETI

NË MUNGESË DHE ME URDHËR
ANËTARI I BORDIT TË ERE
Adriatik BEGO